



Uhapšen Velid Hamdičević, šef Konzularnog odjeljenja u Ambasadi BiH u Francuskoj



Diplomata pomagao trgovcima ljudima?

Prema još nepotvrđenim informacijama, Hamdičević uhapšen u vrijeme godišnjeg odmora koji je koristio u Sarajevu

Almedin ŠIŠIĆ

PARIZ, SARAJEVO - Velid Hamdičević, šef Konzularnog odjeljenja u Ambasadi BiH u Francuskoj, uhapšen je juče u Sarajevu zbog sumnje u povezanost sa organizatorima prosjačenja i trgovine ljudima u ovoj zemlji.

Prema nezvaničnim informacijama našeg lista, Hamdičević je uhapšen u vrijeme godišnjeg odmora koji je koristio u Sarajevu.

Kako saznajemo, akcija hapšenja je provedena u velikoj tajnosti. Hapšenje su obavili pripadnici SIPA iz koje su saopštili da je članovima organizovane kriminalne grupe nezakonito izdavao putne listove za žrtve

trgovine ljudima i za te usluge naplaćivao između 500 i 1.200 evra. Nakon kriminalističke obrade u prostorijama SIPA, kako je saopšteno, biće predat Tužilaštvu BiH uz izvještaj o počinjenom krivičnom djelu i počiniocima.

Iz Tužilaštva BiH su saopćili kako je "uhapšen uposlenik DKP-a u Parizu", ali bez navođenja imena ili inicijala.

"Aktivnosti se provode kao nastavak rada u predmetu CD, koji provodi zajednički istražni tim iz BiH i Francuske. Tužilaštvo BiH je utvrdilo da je jedan od uposlenika DKP BiH u Parizu sudjelovao u nezakonitim aktivnostima koje se odnose na izdavanje dokumenata i omogućavanje putovanja i boravka većem broju osoba uglavnom romske nacionalnosti sa područja BiH, radi činjenja krivičnih djela u Francuskoj", navedeno



BIĆE UTVRĐENO DA LI JE HAMDIČEVIĆ "SREĐIVAO" PASOŠE ZA FRANCUSKU

je, između ostalog, iz Tužilaštva.

Ipak, nije bilo zvanično poznato da li je Hamdičević osumnjičen za povezanost sa klanom Elvisa Salčinovića, osumnjičenog da je unazad godina organizirao trgovinu ljudima, prosjačenje i iskorištavanje maloljetnih Roma u Francuskoj. Inače, ovaj profesionalni diplomata je i savjetnik u Ambasadi u Francuskoj, a prije ove misije dugo je boravio u Briselu, obavljajući slične diplomatske dužnosti.

Podsjećamo, u velikoj koordiniranoj akciji SIPA i francuske policije, kodnog naziva CD, krajem juna je uhapšeno 15 osoba, među kojima i Elvisovi sinovi Denis i Toni Hamidović, te Luka Hrustić. Svi su osumnjičeni za trgovinu ljudima, većinom žena i djece, koje su iskorištavali za džeparenje i prosjačenje u Francuskoj te su na taj način, prema nalazima istrage, pribavili više od dva miliona evra!

U iskazima njihovih žrtava Hamidovići su opisani kao "beskruptozni tirani koji su zahtijevali dnevni prihod od 300 evra".

Tokom akcije, pripadnici SIPA 23. juna u Lukovom Polju u Zenici, u kući Elvisa Salčinovića, pronašli su dvanaestero djece za koju policija nije mogla da utvrdi ponjcklo. Mediji su tada izvjestili da je u toj kući, u kojoj su primijetili kič i luksuz (tako niko iz klana nije zvanično radio), u dvorištu znalo biti i pedesetero djece. Ranije je sud u Francuskoj na sedam godina zatorva osudio Fehima Hamidovića (62), "kralja pariskog podzemlja", koji je tako nazvan u kontekstu džeparenja koja su za njegov klan obavljana u metrou. No, tokom suđenja Hamidović i njegovi advokati krivicu su prebacivali na Elvisa Hamidovića, koji je u međuvremenu promijenio prezime u Salčinović te se vratio u BiH.